

藍山縣圖志

于氏



藍山縣志

手書

藍山縣圖志卷二十六

人物篇第十之四 賢達列傳下目錄

蕭得龍成俞卿成玉清第三十三 楊士樑蕭玉春子瑞麟從第

三十四 蕭瑩陳鎮元朱時藻子延祺第三十五 黃光甲子筮吉暉

吉第三十六 李廷柱子逢春第三十七 王樹人子壽松第三

十八 胡秉安第三十九 趙占春子繼恢趙秉鈞蕭蔭墀第四

十 成雨時陳琮劉志達朱佐宸朱華翰孫尙禹第四十一 陳

令德段湘劉漢基李昭實第四十二 成秀雅黃積彰黃河蔣克

振第四十三 唐世純唐樹唐燦瀛鄧舒鄧光漢子耀南鄧賢珍

弟賢珠 鄧華選第四十四 陳靜淵李兆庚成守貞阮承源陳克

龜陳壽昌第四十五 黃位中黃德勳梁奇琬梁才芳第四十六

蕭元貞雷光炳第四十七 耆英第四十八 成正東朱邦典

子君壽尚程 唐德遇 王忠道 鄒鳴埧 陳獻珂 王調鼎 子鳳儀 黃嘉

燦 鄧大偉封用琦陳 黃光秀 彭承祚 黃洪陽 唐嘉會唐正坤李瓊

李宣文 李繼英 鄧益輕黃振羽 二李第四十九



藍山縣圖志卷二十六

人物篇第十之四

賢達列傳下

蕭得龍成俞卿成玉清列傳第三十三

蕭得龍號海門西隅人其先世自桂陽州方圓墟黃瓜村徙藍得龍額偉有膂力咸豐三年投江華王德榜長字營一見奇之副長一哨從攻新昌上高靖安安義還擊奉新俱克之保外委攻復瑞州戰東鄉豐城蹙白馬砦賊壘數十平之隨援浙略壽昌解衢州圍攻曹會關先登下常山江山時別軍秦如虎奪開化得龍引兵北如安徽襲婺源拔之還軍江西破浮梁及景德鎮率當賊前洊

保都司加游擊銜。自初起百夫長。至是。德榜始委領左營。十年正月。追襲廣信諸賊。最。江西東路平。賊竄浙。得龍扼之玉山。玉山江浙之衝也。賊六出。敢死士撲戰。得龍會諸軍連敗之。會軍餉乏。眾疑統領靳發大譟。得龍所部獨靜。德榜年少氣盛。欲按法誅譟者。親密如楊士樑黃喜光。諫不聽。得龍數語。事遂寢。德榜在軍。凡盛怒。以得龍言輒解。蓋感其樸誠也。明年八月。賊大至。更戰十七都。古城橋屏風關。率先馳。剽賊壘數十。礮傷左手。裹血奮進。玉山肅清。擢游擊加參將銜。同治元年。隨左軍於浙。攻破江山花園港十字街。圖賊龍游。禽酋駱天義。斬之。圍攻至龍游城五里新涼亭。移壁附郭獅子山。乘夜撲之。傷右足。不少挫。龍游復。拜副將。賞換花

翎二年三月還防浮梁。扼賊東。擣軍先踐僞匡王賴諸壘。清浮梁之北。而鄱陽賊守陶家渡益備。挑之不出。得龍選銳。披崇光渡。進營茅屋嶺。瞰之。賊計掇我師。夜遁。我軍分截。得龍督士卒火其巢。捷聞。擢總兵。賞彪勇巴圖魯。會軍獵樂平。保廣信。廣豐弋陽貴溪等處。最。詔以總兵簡放。加提督銜。三年。仍調浙。攻箴頭黃洞橋。復武康德清石門。略地至弋陽方家墩。黃沙港。荷包嶺。遂由羅田。躡賊東鄉。旁擊梅橋河防。搗賊館十二處。禽斬黃正魁。奪攻七星橋。老虎岡。賊棄東鄉。我軍長驅。定崇仁宜黃。所將士卒。當先衝爲多。於是曾國藩以東鄉崇仁宜黃之功入告。詔以提督記名。左宗棠以恢復武康德清石門等處之功入告。詔三代皆一品封典。得龍

因從左軍領閩浙督標左營虎勇南擊粵四年十二月軍嘉應州圍殲巨魁掃餘寇最賞博奇巴圖魯是時東南軍事稍紓矣罷軍歸無何西師起德榜檄赴甘州領定西右營十二年三月宗棠檄領定西副中左右諸營明年兼統振威營壁狄道州徂遏竄回休戰不解關隴平詔封三代正一品其原官提督准遇缺題奏光緒四年再乞歸六年四月以提督差往甘肅乞假歸修先人廬墓適江華徭亂鄉父老畱治團防大橋七年赴甘詔免騎射八年譚鍾麟督陝甘檄署督標前營游擊轉右營參將十年法蘭西渝盟越南亂德榜統定邊楚軍蒞粵西咨譚奏得龍往聞命回楚募舊部馳至龍州分統定邊楚軍副左右營領左營事十一年二月奪回

鎮南關文淵州大捷諒山破駟騾谷松諸險隘當先趣戰礮彈雨
下植立猛進生禽夷酋一人獲器械無算和議成賞穿黃馬褂得
龍居恆溫溫不苟論世故惟言越南戰事輒怒髮上指恨用兵未
竟彼夷之未大創也十二年赴甘署督標右營參將轉涼州莊浪
協軍興提鎮遍天下然率不得拜本官真除譚鍾麟請以得龍借
補肅州鎮標右營游擊旋創發薨於莊浪任所年六十有四得龍
用兵愛人。不妄誅戮。善激厲士卒。臨陣恥後敵。故諸帥咸以爲可
當一面。轉戰江浙粵皖楚秦隴七八省。未嘗挫敗。其後與法夷戰。
亦卒以有功。戰事無論古今中外。豈不以人乎哉。卒後光緒二十
三年。朝廷思念前勞。詔國史館爲列傳焉。子世英。湖北候補知縣。

孫崇蔭

成俞卿字楚材。富陽成氏子也。高祖帥正。服賈於衡陽。住西鄉十三都。後遂入衡陽籍。父鳳書。庠生。母歐陽氏。均以俞卿官膺一品封。俞卿讀書通五經。尙膂力。壯有大志。衡陽協蘇某器之。招致帳下。咸豐初。洪楊軍起。隨調赴粵西。從向榮軍。轉戰豫鄂皖吳。大小百餘戰。解圍廬州。彈傷拇指。憊甚。主帥憫之。遣回里調治。甫愈。投曾國藩大營。受知於彭玉麐。充內湖水師前營營官。旋委兼淮陽水師前營。賊據瑞州。水陸軍圍攻之。陸軍近城。弗敢入。賊突出漫江攔截。水軍必陷。俞卿率兵直衝其鋒。誓於眾曰。有進無退。遂大敗之。功最。調赴上海。以舟載火藥軍裝。鼓柁而前。至九洑洲。賊眾

雲集礮石如雨下。俞卿身先士卒，徑出賊後，賊棄九洑洲遁。隨攻草鞋夾，克之。進圍崑山，俞卿兵先下正義鎮，斷賊歸路，遂克崑山。李鴻章圍攻蘇州，檄俞卿領一軍鎮守許墅關，晝夜防禦，不少懈。賊不得逞，進紮黃天蕩。會陸營統帶程學啟、淮陽統帶歐陽利見合兵攻寶帶橋，破之。復攻克九龍橋、白塘市等處，移攻白門。金陵克復，俞卿累功保提督，以總兵遇缺簡放，賞戴花翎，從一品封典。達桑阿巴圖魯以前傷拇指，免騎射。同治三年，署福山鎮總兵。數年，軍民懷德，立長生祿位牌以祀。八年，誥授建威將軍，借補長江江陰協鎮。十一年，簡放湖北鄖陽總鎮。光緒六年卒於官，俞卿爲人宅心慈愛，馭下以寬，領兵二十餘年，與士卒同甘苦，故能所至。

有功。禮賢下士。恂恂容止。好覽經史。尤嗜漢書。善作科蚪大文。所書龍虎字。人爭購之。長子槐。歷任湖北竹山羅田知縣。三子楨。山東東阿縣知縣。

成玉清。字崑山。少有大志。膽勇過人。咸豐中。從鮑超援江西浙江。所向有功。同治三年。大軍圍攻金陵。鮑軍進兵句容。有三叉河者。要隘也。賊死守。數攻不利。玉清請率部黑夜往襲。鮑壯而許之。乃選八十人。銜枚馳走。夜四鼓。薄城下。城上柝聲斷續。玉清架梯登城。斬守巡賊。移礮轉擊之。賊驚潰。大軍繼至。遂奪其城。積功授副將。有鍾明府漢欽作詩以贈。比之狄青。夜奪崑崙關云。玉清自此益奮發。思建奇功。是年七月。鮑超進攻撫州。偽康王汪海洋踞守。

許灣張黃蓋督戰勢甚盛玉清曰彼可取也麾百騎突入重圍亂
鋒交下賊皆辟易遂克許灣而百騎喪亡過半玉清亦身受重創
累功保花翎協鎮因傷假歸遂不復出玉清幼時未嘗竟學自入
軍後曉解文義家居二十餘年卒

贊曰龍戰虎贇披堅掃穢海門奇績秦隴遺愛楚材之勳江海作
父矯矯崑山奮功善退

楊士樑蕭玉春

子瑞麟從
子書麟

列傳第三十四

楊士樑號隆卿又號農卿家舜鄉大橋近徭地王湘綺州志以此
盤白鳳謂白鳳能文士樑以軍功至道員文武彬彬矣然士樑故
寧遠籍其先有慶崇者明清間避亂自寧遠平田徙此以農墾起

家士樑其十二代孫也。士樑祖文祥，邑庠生。父承傑，贈中憲大夫。士樑幼穎悟，有氣概，弱冠游庠，好窺諸子百家言，思有以著見。常居村近之觀音菴，閉戶闇修，夜見月色，輒喟然歎曰：「月到天心，而此心乃略無悟澈，名業將安所成乎？」父命分居，士樑意不樂，乃託外避，任兄弟自擇田宅。士樑分田二十畝，築莊而耕，旣耕且讀，攜妻子居之。嘗有句曰：「雲去雲來長伴耕。」遂以耕雲名莊。咸豐二三年間，紅巾寇起，粵竄大橋，窺縣城。士樑辦鄉團，數挫賊，地方稍安。是時洪秀全軍據南京，天下郡邑人士羣起謀賊，遊戎王吉昌者，江華人，奉曾國藩檄歸鄉召募，因告士樑，各輸家財募營成軍，以出。知縣張嗣康疑其擅越，竟以上聞而褫士樑衣頂。士樑中途聞

信。或勸歸辯。士樑不顧也。遂至長沙。編所募爲長字營。士樑居營務處。旋以克復奉新。新昌。上高。安義。靖安等縣功。保訓導。而吉昌以力戰捐軀。統帥左宗棠屬士樑接領長營。士樑辭曰。募鄉軍出王游戎輸財獨多。士樑隨其後。敢代其軍乎。有伊弟德榜在。請畀之。宗棠義而可之。然德榜時年才十餘歲。士樑實左右之。效力甚劬。勤。咸豐八年。解衢州圍。收復常山。開化。江山等城。九年。克復婺源。保縣丞。三月。克復景德鎮。浮梁等城。保知縣。十月。防剿彭澤。玉山。淳保。直隸州。同治二年正月。克復龍游。加知府銜。賞換花翎。或有諷士樑功多而賞薄者。士樑豁如也。蓋德榜報戰功於士樑。不無抑制云。士樑每得保舉。輒有記錄。是役。自記云。龍游克復。王公

朗清

德榜號

以余督隊拔城身冒矢石不無微勞將爲請知府銜並

賞換花翎書牘將發文案先生以示余且曰以君之功卽知府記名加賞號亦不爲泰何其薄請乎余急掩其口曰是何言今非記功時也羣孽未靖生靈塗炭使人人存賞功之心或以其賞薄而致懈怠以逸賊亂何時定乎元戎傲功於朝廷偏裨傲功於元戎士卒傲功於偏裨是助孽延禍之道也朗清待余厚願少言以寡余過旋掃清陶家渡賊壘擢道銜又以肅清樂平力保弋陽貴溪等城江西撫部院沈文肅葆楨請以道員畱江西儘先補用部駁之六年江西撫部院劉再論陶家渡弋陽兩役督隊爭先擒斬僞天將曹荃殺悍賊多人厥功甚偉仍請以道員畱江西儘先補用

詔可之。至是而藍山儒學曾廣生高樹棟，乃爲詳復附生名籍。士樑居贛，綜理城防，出治公幹，入玩書史，有以自得。大府特重之。會徐樹銘使江西，劉中丞極論士樑將奏補某道缺，他勢要輦金爭之。士樑不缺望也。日與名流觴詠，並繪故里耕雲莊圖，徵題成冊。旋沒於江西，年五十有四。子世湘，試用知縣，授吉安府永豐縣沙溪司巡檢，扶櫬以歸。士樑遭時多難，起鄉兵，及通籍，例晉京引見，需費告乏，典質莊田二十畝者三次。所著耕雲莊詩文集，內有半山子傳三十首壽諸篇，託心遙遠，詞長不具錄。

蕭玉春，字溫其，號寶田，又號璧卿。以美鬚髯，故又稱璧髯云。其先出自江西。南宋時有曰穆林者，仕衡州，遂家於藍山之盤石。穆林